

KEMANISAN SIFAT REDA

الْحَمْدُ لِلَّهِ نَحْمَدُهُ وَنَسْتَعِينُهُ وَنَسْتَغْفِرُهُ. وَنَعُوذُ بِاللَّهِ مِنْ شُرُورِ أَنْفُسِنَا وَمِنْ سَيِّئَاتِ أَعْمَالِنَا.
مَنْ يَهْدِهِ اللَّهُ فَلَا مُضِلَّ لَهُ، وَمَنْ يَضِلَّ فَلَا هَادِيَ لَهُ.

أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ سَيِّدَنَا مُحَمَّدًا عَبْدُهُ
وَرَسُولُهُ؛ اللَّهُمَّ صَلِّ وَسَلِّمْ عَلَى سَيِّدِنَا مُحَمَّدٍ وَعَلَى آلِهِ وَصَحْبِهِ أَجْمَعِينَ.
أَمَّا بَعْدُ،

فِيَا عِبَادَ اللَّهِ اتَّقُوا اللَّهَ أَوْصِيكُمْ وَنَفْسِي بِتَقْوَى اللَّهِ فَقَدْ فَازَ الْمُتَّقُونَ.

Marilah kita bersama-sama meningkatkan ketakwaan kepada Allah Subhanahu wa Taala dengan melaksanakan segala perintah dan meninggalkan segala larangan-Nya. Mudah-mudahan kehidupan kita diberkati dan dirahmati Allah Subhanahu wa Taala di dunia dan akhirat.

Sidang Jumaat yang dirahmati Allah Subhanahu wa Taala

Setiap manusia sentiasa akan menghadapi ujian kehidupan sama ada kesusahan, kesenangan, sihat, sakit dan sebagainya. Namun kita perlu yakin bahawa semua itu adalah untuk mendidik kita agar bersabar dan reda dengan ketentuan Allah Subhanahu wa Taala. Sifat reda adalah asas yang membentuk jati diri manusia bagi penyempurnaan iman serta menjadikan seseorang muslim itu merasai kemanisan iman. Sifat reda dalam menerima ketentuan Allah Subhanahu wa Taala membawa kita kepada kesempurnaan iman.

Pada dasarnya segala perintah Allah Subhanahu wa Taala sama ada yang wajib atau pun sunat, hendaklah dikerjakan dengan senang hati dan reda. Demikian juga dengan larangan-larangan Allah Subhanahu wa Taala hendaklah di jauhi. Firman Allah Subhanahu wa Taala dalam surah al-Nisa' ayat 65,

أَعُوذُ بِاللَّهِ مِنَ الشَّيْطَانِ الرَّجِيمِ

فَلَا وَرَبِّكَ لَا يُؤْمِنُونَ حَتَّى يُحَكِّمُوكَ فِيمَا شَجَرَ بَيْنَهُمْ ثُمَّ لَا يَجِدُوا فِي أَنْفُسِهِمْ

حَرَجًا مِّمَّا قَضَيْتَ وَيُسَلِّمُوا تَسْلِيمًا ﴿٦٥﴾

Yang bermaksud: “Maka demi Tuhanmu, mereka tidak disifatkan beriman sehingga mereka menjadikan engkau hakim dalam perselisihan yang timbul antara mereka kemudian mereka pula tidak merasa di hati mereka keberatan dari apa yang telah engkau hukumkan, dan mereka menerima keputusan itu dengan sepenuhnya.”

Memang ada dalam kalangan kita yang keadaannya fakir atau miskin, tetapi itu mungkin merupakan yang terbaik baginya daripada menjadi kaya raya. Mungkin kefakirannya itu, merupakan peluang untuknya memperbaiki diri dan lebih dekat kepada Allah, manakala kemewahan boleh menyebabkannya lalai lantas merosakkan kehidupannya. Begitulah juga dengan ujian kekayaan, kesihatan, kesakitan, kejayaan, kegagalan dan sebagainya. Apa juga bentuknya, kita wajib beriman dan reda atas segala ketentuan Allah sama ada kita suka atau tidak.

Sidang Jumaat yang dirahmati Allah Subhanahu wa Taala,

Sifat reda kepada Allah Subhanahu wa Taala itu terbahagi kepada dua jenis. Pertama, reda menerima peraturan (hukum) Allah yang di'taklif'kan kepada

manusia seperti solat lima waktu secara berjemaah, kewajipan menjaga aurat dan sebagainya. Reda dalam konteks ini membawa kepada kesempurnaan iman. Firman Allah *subhanahu wa taala* dalam surah al-Taubah ayat 62:

تَحْلِفُونَ بِاللَّهِ لَكُمْ لِيَرْضَوْكُمْ وَاللَّهُ وَرَسُولُهُ أَحَقُّ أَنْ يُرْضَوْهُ إِنْ كَانُوا

مُؤْمِنِينَ ﴿٦٢﴾

Yang bermaksud, “Mereka bersumpah dengan nama Allah kepadamu untuk mencari keredaanmu, padahal Allah dan Rasul-Nya lebih berhak mereka mendapat keredaannya, jika betul mereka orang yang beriman”.

Kedua, reda menerima ketentuan (*qadha*’) Allah tentang nasib diri sama ada mendapat nikmat atau musibah seperti kemalangan jalan raya yang menyebabkan kematian anggota keluarga sehingga tinggal sebatang kara, kebakaran dan sebagainya. Kebiasaannya ketika mendapat nikmat, kita akan menerima dan bersyukur tetapi jika menerima musibah agak sukar untuk kita reda dan bersabar. Bagi mencapai sifat reda kita perlu memperkuat iman, bersifat sabar, mengingati dan taat kepada Allah, memelihara amal ibadah yang wajib dan sunat serta menjauhi larangan Allah Subhanahu wa Taala. Firman Allah Subhanahu wa Taala dalam surah Taha ayat 130:

فَأَصْبِرْ عَلَىٰ مَا يَقُولُونَ وَسَبِّحْ بِحَمْدِ رَبِّكَ قَبْلَ طُلُوعِ الشَّمْسِ وَقَبْلَ غُرُوبِهَا وَمِنْ آنَاءِ اللَّيْلِ

فَسَبِّحْ وَأَطْرَافَ النَّهَارِ لَعَلَّكَ تَرْضَىٰ ﴿١٣٠﴾

Yang bermaksud: “Maka bersabarlah engkau wahai Muhammad akan apa yang mereka katakan, dan beribadatlah dengan memuji Tuhanmu sebelum matahari terbit dan sebelum terbenamnya; dan beribadatlah pada saat-saat dari waktu malam dan sebelah siang; supaya engkau mendapat keredaan-Nya.”.

Sidang Jumaat yang dirahmati Allah Subhanahu wa Taala,

Untuk mendapat kemanisan sifat reda, maka antara langkah yang disarankan ialah pertama, mengamalkan sifat *qana'ah* iaitu berpuas hati dengan apa yang ada terhadap nikmat yang diberikan oleh Allah Subhanahu wa Taala. Kedua, mengamalkan sikap *mujahadah an-nafs* iaitu mengawal keinginan nafsu agar kita sentiasa *istiqamah* dalam melakukan ketaatan dan ibadah kepada Allah Subhanahu wa Taala. Ketiga, selalu melihat kepada orang yang lebih susah daripada kita. Keempat, memperbanyak doa dan merendahkan diri kepada Allah Subhanahu wa Taala agar dikurniakan kita sifat reda.

Sesungguhnya, sifat reda akan melapangkan jiwa, bersangka baik terhadap orang lain, jauh daripada sifat mazmumah seperti iri hati, hasad dengki dan tamak haloba. Oleh itu, sifat reda mendatangkan ketenangan rohani dan jasmani kepada manusia. Allah Subhanahu wa Taala akan memberi ganjaran syurga kepada orang yang reda di atas ujian yang diberikan. Firman Allah Subhanahu wa Taala dalam surah al-Taubah ayat 59:

أَعُوذُ بِاللَّهِ مِنَ الشَّيْطَانِ الرَّجِيمِ
وَلَوْ أَنَّهُمْ رَضُوا مَا آتَاهُمُ اللَّهُ وَرَسُولُهُ وَقَالُوا حَسْبُنَا اللَّهُ سَيُؤْتِينَا اللَّهُ مِنْ فَضْلِهِ وَرَسُولُهُ إِنَّا إِلَى اللَّهِ رَاغِبُونَ

Yang bermaksud: “Dan kalau mereka berpuas hati dengan apa yang diberikan oleh Allah dan Rasul-Nya kepada mereka, sambil mereka berkata: Cukuplah Allah bagi kami; Allah akan memberi kepada kami dari limpah kurnia-Nya, demikian juga Rasul-Nya; sesungguhnya kami sentiasa berharap kepada Allah.”

بَارَكَ اللهُ لِي وَلَكُمْ بِالْقُرْآنِ الْعَظِيمِ وَنَفَعَنِي وَإِيَّاكُمْ بِمَا فِيهِ مِنَ الْآيَاتِ وَالذِّكْرِ
الْحَكِيمِ وَتَقَبَّلَ مِنِّي وَمِنْكُمْ تِلَاوَتَهُ إِنَّهُ هُوَ السَّمِيعُ الْعَلِيمُ. أَقُولُ قَوْلِي هَذَا
وَأَسْتَغْفِرُ اللهَ الْعَظِيمَ لِي وَلَكُمْ وَلِسَائِرِ الْمُسْلِمِينَ وَالْمُسْلِمَاتِ وَالْمُؤْمِنِينَ
وَالْمُؤْمِنَاتِ فَاسْتَغْفِرُوهُ إِنَّهُ هُوَ الْغَفُورُ الرَّحِيمُ.